

Glisch verda per il center per requirents d'asil

■ (anr/fa) Cun 108:0 vuschs ed otg abstenziuns da la vusch ha il parlament grischun approvà il credit d'impegn da 7,7 milliuns francs per construir en il Meiersboden in center per l'emprima registraziun da requirents d'asil.

Ils ultims onns s'ha augmentà il dumber da requirents d'asil fermamain. 2,7 pertschient da quellas persunas surdat la confederaziun al chantun Grischun. Al cumenzament arrivian quellas persunas en il center per l'emprima registraziun da requirents d'asil Foral a Cuira. Causa che quel center vegn serrà d'atun 2017 dovra il Grischun in nov da quests centers. «Ins ha fatg l'experientscha che la tschertga da lieus adattads per uschè in center è fitg difficila», ha ditg la presidenta da la cumissiun predelinberanta *Brigitta Hitz-Rusch* (pld, Churwalden) mesemna a l'entschatta da la debatta d'entrada, «en quest cas han ins però chattà en il Meiersboden in lieu adattà per quist center: L'areal è proprietad dal chantun e la zona permetta da construir qua uschè in center.» Ina cundiziun è era la stretga vischinanza cun Cuira, nua che sa chattan ils uffizis che mainan las proceduras d'asil.

«In edifizii funcziunal e betg luxurius»

Il project proponì da la regenza prevesa in edifizii cun lieu per 180 persunas per custs da 7,7 milliuns francs. Ils custs da gestiun annuals en quest center en proprietad dal chantun vegnan ad importar 1,07 milliuns francs. Quels en il center Foral s'amuntan ad 1,37 milliuns francs l'onn. A chaschun da la debatta d'entrada han *Andri Perl* (ps, Cuira), *Andreas Felix* (pbd, Tschintg Vitgs) e *Hans Geiseler* (pcd, Tschintg Vitgs) numnà il center planisà «raschunaivel, al dretg lieu, funcziunal e betg luxurius». *Urs Marti* (pld, Cuira) ha menziunà en sia funcziun da president da la citad da Cuira las bunas experientschas ch'ins haja fatg cun il center per l'emprima registraziun da requirents d'asil Foral. El saja persvas che quai saja il cas er cun il center en il Meiersboden. «Ils motivs per la migraziun nun èn da schliar cun quest center, nus da la pps vesain la soluziun plitost cun sustegnair chomps per fugitivs en vischinanza da las zonas en crisa», ha ditg *Beath Nay* (pps, Cuira) ed annunzià che la maioritad da la fracziun da la pps vegnia a s'abstegnair da la vusch. Cusseglia guvernativ *Mario Cavigelli* ha express ses plaschair per il sustegn per il project preschentà da la regenza. Cun 108:0 vuschs ed otg abstenziuns da la vusch ha acceptà il cussegl grond il credit da 7,7 milliuns francs. Igl è previs da cumenzar a construir il center en il Meiersboden la stad 2016. Pront per vegnir duvrà vegn el ad esser l'atun 2017.